



Gabinete Wever - Croes II

ISLAONLINE


Noticia di Gobierno

2023

Diabierna 8 September 2023

Email: IslaOnline@gobierno.aw Tel: 528-4952

2023
AÑA DI



UNION
Y POSITIVISMO!



@IslaOnline2023



GRAN MAYORIA DEN PARLAMENTO A VOTA CONTRA E RAFT

**Y a aproba e mocionnan pa pidi Gabinete Wever-Croes
sigui negocia cu Hulanda**



E reunion publico den Parlamento diahuebs mainta na unda cu Gobierno di Aruba a duna un update riba negosacionnan cu ta tumando luga cu Hulanda, a conclui cu mayoria Parlamento a aproba e mocionnan pa pidi Gabinete Wever-Croes pa sigui na mesa cu Hulanda pa negocia e miho arreglo den beneficio pa henter pueblo di Aruba. Prome Minister Evelyn Wever-Croes a elabora ampliamente riba e trayectoria di negosacionnan cu Hulanda desde cu dia 22 di augustus ultimo, Parlamento a duna indicacion con nan lo kier pa Gobierno sigui negocia cu Hulanda

Den oranan di anochi, votacion a tuma luga riba e mocionnan cu a wordo presenta durante e reunion publico. Oposicion a presenta un mocion pa urgi Gobierno di Aruba firma Raft prome cu 1 di october 2023. E mocion aki a conta cu solamente 5 voto di sosten di Parlamentarionan Miguel Mansur, Gerlien Croes, Rycond do Nascimento, Aquanette Gunn y Marisol Lopez-Tromp. Fraccionnan di MEP, RAIZ y AVP a vota contra e mocion. Apenas 5 voto na favor y 16 en contra, y cu esaki RAft ta pasa pa pasado! Mocionnan pa pidi Gobierno sigui negocia cu Hulanda, a wordo aproba.

Durante e reunion den Parlamento, Prome Minister a anuncia cu Gobierno di Aruba a haci un proposicion na Hulanda pa yega na un acuerdo riba liñanan grandi. Den e acuerdo aki, Gobierno a propone pa traha cu un solucion hibride, un Rijkswet, Ley di Reino, cu ta regla algun aspecto y un Landsverordening, un ley local, cu ta regla algun aspecto. Hulanda a indica di ta dispuesto pa sigui papia riba e tema di solucion hibride. Negosacionnan di ambos gobierno lo sigui pa propone kico ta bay den un Ley di Reino y kico ta bay den un Ley Local.

“Gabinete Wever-Croes lo sigui traha y negocia cu Hulanda pa yega na e miho solucion pa nos pueblo. Mi ta gradici e Parlamentarionan cu a duna sosten na e mocion pa Gobierno sigui negocia cu Hulanda pa yega na e miho arreglo den beneficio pa henter pueblo di Aruba”, Prome Minister Evelyn Wever-Croes a duna di conoce.



Prome Minister Evelyn Wever-Croes:

REUNION ENTRE GOBIERNO DI ARUBA Y INVERSIONISTA Y DESAROYADONAN DI SECRETS BABY BEACH ARUBA TABATA UNO POSITIVO

Diahuebs atardi, a tuma luga un reunion entre Prome Minister Evelyn Wever-Croes y e inversionista y desaroyadonan di Secrets Baby Beach Aruba, pa asina combersa riba e status di e proyecto. Manera ta conoci, un parti di e proyecto aki ta den corte, y ta ocasionando un tardansa den e proceso di construccion di e hotel. Un situacion cu a ocasiona preocupacion pa e inversionista y desaroyadonan cu a bin bishita Aruba pa mira e avansenan.

Durante nan recorrido riba nos isla, e inversionista y desaroyadonan a keda hopi impresiona cu nos isla y a expresa cu nan a 'fall in love' cu nos isla. Nan a ripara tambe cu turismo ta 'blooming' y nan ta considera cu e proyecto di Secrets Baby Beach Aruba ta bon pa Aruba y specialmente pa San Nicolas. Mas ainda, nan a mira e compromiso di Prome Minister y Gabinete Wever-Croes pa desaroya San Nicolas y Aruba en general. Nan a keda hopi impresiona cu e vision di Prome Minister pa reforma San Nicolas.

Durante e reunion, Prome Minister a informa nan, cu Gobierno ta sostene e proyecto aki, y ta kere cu e lo cambia ful e dinamismo di e desaroyo di San Nicolas y Aruba en general. E proyecto aki lo trece cu ne oportunidad di empleo pa esnan cu no tin trabou, y lo haci bida mas facil pa esunnan cu ta biba pariba di brug, cu no mester coy transporte tur mainta extra trempa pa yega nan luga di trabou.

Prome Minister a indica cu e reunion a bay den bon ambiente, na unda tanto Gobierno como e inversionista y desaroyadonan, tabata tin e oportunidad di trece nan puntonan dilanti, y expresa nan preocupacionnan. Aruba ta den pleno recuperacion, y ta compromiso di Gobierno pa percura cu tur ciudadano di pais Aruba por sinti e progreso y bienestar.

Presidente di e Grupo Martinon, sr Artur Cabre a expresa di ta contento pa scucha cu Gobierno di Aruba y e pueblo di San Nicolas ta para tras di e proyecto aki, mirando cu a inverti un suma substancial pa construccion di Secrets Baby Beach. E ta gradici San Nicolas Business Association pa organisa e evento pa colecciona firma, y e pueblo di Aruba pa yega eyan y firma.

Tambe ta importante cu e socionan por a haya un splicacion di Prome Minister di loke en realidad ta pasando cu construccion di e hotel, mirando cu e tradansa a cuminsa pone e socionan duda si ta excuse nan ta dunando pa para trabou. Sr. Cabre a indica cu e reunion cu Prome Minister a trece un claridad na e socionan y mirando e compromiso di Gobierno pa haci e proyecto aki un realidad, a duna nan un sentimento di seguridad cu pronto Secrets Baby Beach Aruba por wordo inaugura.





MINISTER MADURO TA INFORMA CU E URK1 2023 TA DISPONIBEL CU TUR INFORMACION DI FINANSA PUBLICO DI E PROME KWARTAAL E ta disponibel riba www.gobierno.aw



Cada kwartaal Minister di Finansa ta publica un 'uitvoeringsrapportage' (URK) den cual ta duna un bista amplio di tur informacion financiero di Pais Aruba. Den e URK por haya informacion riba e ehecucion di Presupuesto 2023 y ta duna un bista amplio riba entrada, gasto, debe, esfuerso pa baha gasto di personal, maneho financiero, estado di likides, etc...etc., y tur otro informacion relevante di finansa publico di Aruba.

Tur kwartaal Minister di Finansa ta manda e URK pa Parlamento. CAFT tambe ta haya e URK pa asina nan duna nan opinion riba e raportahe. Parlamento tambe ta haya e conseho/opinion di CAFT pa por tin un bista completo di Aruba su finansa publico. E URK ta un documento publico y ta wordo publica riba www.gobierno.aw pa e informacion por ta accesibel pa tur hende.



REGERING VAN ARUBA

Minister van Financiën en
Cultuur

L.G. Smith Blvd. 76
Oranjestad, Aruba
Tel. (297) 528 4900



1e kwartaal 2023



E KICK OFF MEETING PA DIGITALISA SECTOR DI CUIDO A TUMA LUGAR



Diaranson a tuma lugar e kick off meeting entre Ministerio di Turismo y Salud Publico, Setar NV y AZV. Esaki a tuma lugar na bestuurskantoor apenas 6 dia despues cu a firma e acuerdo di intencion. Minister Dangui Oduber mes a dirigi e prome reunion caminda ta bay traha hunto pa digitalisa henter e sector di cuido na Aruba. Tur esaki ta conforme e maneho di Minister Oduber cu ta basa na mehora e calidad y servicio den cuido medico.

Ministerio di Turismo y Salud Publico semper a kere den innovacion haciendo uzo di tecnologia pa mehora diferente serviccionan. Durante pandemia a introduci e Aruba Health App cu a maneha henter e programa di vacunacion. Mas di 80 mil persona registra na Aruba a haci uzo di e aplicacion aki. E plataforma di Aruba Health App a keda reconoci mundialmente pa e innovacion aki. Tambe Aruba a gana hopi premionan internacionalmente pa e vision innovativo cu Aruba tabata tin pa lansa un App pa maneha testnan di local y turistanan durante e pandemia. Despues a lansa e proyecto di Aruba Happy One Pass cu tambe resulta hopi exitoso. Conhuntamente cu SVb a lansa e App di Mi SvB y den pasado a lansa tambe e App di AZV. Aki por mira cu semper innovacion tabata central den e maneho di Minister Oduber.

KICK OFF MEETING

E prome reunion pa digitalisa henter e sector di cuido ta uno hopi importante. Den e reunion aki a determina e contenido di e acuerdo cu lo mester wordo firma oficialmente prome cu 1 di november 2023. A pone lineanan recto di e estructura di con ta bay traha cu otro. A muestra riba cua ta e prioridadnan pa



Ministerio di Turismo y Salud Publico y tambe e “timeline” cu lo bay traha cune. E punto di salida di Ministerio ta cu lo kier mira resultadonan concreto por medio di e acuerdo cu lo wordo firma. Kier mira un mehoracion di e calidad di servicio cu ta wordo duna na e aseguradonan. Kier mira mihor accesibilidad pa e aseguradonan cu nan dokter di cas y specialistanan, kier mira mas eficiencia y transparencia. E plataforma cu a scohe pa haci esaki ta e Aruba Health App.

E META TA PA SIGUI DESAROYA E “ARUBA HEALTH APP” PA FACILITA SERVICIONAN DEN CUIDO MEDICO.

Lo bay desaroya e aplicacion pa den un manera mas eficiente, e asegurado por traha su afspraak via e app aki sea ta na un dokter di cas of un especialista. Tambe lo bay desaroya e app di un manera cu lo bay trata di incorpora un manera pa e asegurado por ricibi y maneha su resultado di test nan den e aplicacion mes. Un otro desaroyo importante di e aplicacion lo ta pa duna e posibilidad pa e asegurado por ricibi su recetan prescribi den manera digital hunt cu un film cu ta demostra con pa usa e remedi nan prescribi. Por ultimo via e aplicacion e asegurado lo por haya estadisticanan di su consumo di remedi y di su bishitanan na dokter y especialista. Tur esaki ta den cuadro di transparencia pa e asegurado y tambe pa AZV tin un mihor bista.

E proyecto innovativo aki lo bay cambia henter e sector di cuido na beneficio di e asegurado. Minister Oduber ta hopi contento di e “partnership” cu tin entre Setar NV y AZV. Hunto ta bay logra cosnan grandi pa Aruba.



MINISTER ENDY CROES TA GRADICI JUFFROUW USTELLE CORNET CU A SIRBI ENSEÑANSA DI ARUBA DURANTE 36 AÑA



Diamars ultimo, Minister di Enseñansa y Deporte Endy Croes a entrega un reconocimiento na Juffrouw Ustelle Cornet cu a sirbi enseñansa durante 36 aña. Despues di 36 aña, Juffrouw Ustelle ta retira di e veld di enseñansa pa baha cu pensioen. Juffrouw Ustelle a cuminsa traha na aña 1987 na Reina Beatrix School como maestra di aña 2 y na aña 1988 a cuminsa traha na Commandeur Pieter Boer School cu actualmente ta bou di e nomber di Scol Basico Xander Bogaerts.

Juff Ustelle a bira cabesante di Scol Basico Xander Bogaerts na aña 2012 y a traha den e posicion ey te cu awo. Minister Endy Croes ta gradici Juffrouw Ustelle pa tur e añanan cu a educa e muchanan cu hopi pasion. Pa finalisa, Minister Endy Croes ta desea Juffrouw Ustelle hopi éxito y pa gosa di su pensioen merecidamente.



CONCURSO di Pintamento 2023



Bo Kier Participa?

1. Participacion ta gratis! Tur muchanan di scol basico por participa (1e - 6e klas)
2. Si bo no a ricibi e formulario na scol, bo por download e formulario via: specialprojectsaruba.org
3. Tarea 1: Duna bo cacho un number
Tarea 2: Pinta un (of mas) cacho den cura
4. Bo pintura mester ta uno original y creativo, e pintura mester ilustra un cacho den cura y bo por incorpora mas di e puntonan di e Ley di Cacho den dje
5. E pintura mester ta den color y mester ta pinta door di e mucha mes
6. Un (1) pintura pa cada participante; entrega bo formulario no mas tarda cu dia 22 di september 2023 na Bestuurskantoor Oranjestad, na HBK San Nicolas, of na e MFA mas cerca dibo
7. E ganadornan di cada klas lo wordo anuncia dia 4 di oktober 2023 Dierendag riba e pagina facebook di Gabinete Wever-Croes
8. Lo tin un regalito pa tur e ganadornan cu lo wordo entrega fin di oktober

Ley Di Cacho!



- Bo cacho mester ta den cura y no riba caya
- Bo cacho mester por tin suficiente espacio pa e por move den su cura y mester por sconde pa awasero, biento y solo, dus bo cacho mester tin un casita of mester por bay bou un dak
- Bo mascota mester haya awa limpi pa e bebe y cuminda fresco y adecuado, dus duna bo cacho cuminda di cacho
- Ora bo kier keiro cu bo cacho, mara un liña na su banchi pa bo tene, pa por tin control riba dje y mester piki su sushi si e pupu ora boso keiro 🍌
- Hiba bo mascota dokter di bestia ora e ta birando malo, ora e mester haya su vacuna, y ora e mester opera, por ehempel pa bo cacho no haya puppies



Informacion di Participante



Number y Fam: _____
Fecha di Nacemento: _____ Edad: _____
Scol: _____ Klas: _____
Number di Telefon di Mayor: _____



Un nomber faborito pa bo cacho: _____

Area pa pinta ↓

Area pa pinta ↓



Positivismo ta un factor importante pa logra union. Ora cu famianan y comunidadnan ta traha hunto pa metanan comun, e chens pa exito ta bira mas grandi. Tambe e ta crea un ambiente mas stabiel y harmonioso cu ta necesario pa e crecimiento y desaroyo di un sociedad.